



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 9

Justice C S Karnan Kolkata
Presidency Jail nung puokogo



TAPAK 10

England chubatsür-i
'Queen's Speech' agütsüogo

VOL. XIV NO. 244 (ADOK 244)

DIMAPUR

THURSDAY

JUNE 22, 2017

5.00

NPF ya BJP aser NDA den teyariteper tajung ka lir

Dimapur, June 21 (TYO): 1970s tatemlen nungi Naga People's Front ya non-Congress national party den teyariteper ka ama arur aser 2003 tetenzüklen non-Congress political party tem longjemer Democratic Alliance of Nagaland (DAN) tenzükang iba teloktep tashi itshi, ta Dr Shurhozeli Liezietsu-i tanü sangdong ka nung metetdaksü.

DAN tentetba mapang NDA Chairman, George Fernandes-ia tenanzükba nung sign asü. Iba mapang nungi, teloktep tashitaitba kuma arur aser tang NPF aser BJP den Independent MLA 7-i teyari agüja nungiter, ta paisa ashi.

Talisa, yaküm May ita North East Democratic Alliance (NEDA) tentetba nung BJP aser NPF ya telok tongtitem lir aser

iba tesentaktep ya Manipur tashi raloka ogo aser idakji BJP-i aniba sorkar nung NPF MLA pezü dena lir, ta Dr. Shurhozeli-ia ashi.

BJP den tesentaktep yanglubaji tajanzük mesüra tashi angutsü atema masü saka tangatbatem nung ajemdaker yangluba lir. Northeast nung tajanzük, terenlok aser sorkar ketdangsubaren tajung agütsüsü nükjidong nung tesentakteppi ayu aser iba ya meraksai maneni aotsü, ta paisa metetdaksü.

BJP aser NDA atema NPF ya teti teyariteper ka asütsü aser NPF ya NEDA nunga tongti telok ka asünung, NPF-i aniba DAN sorkari taruba India Tir atema NDA-i shimba nübo nem vote agütsüsü, ta Dr. Shurhozeli-ia sangdong nung shia lir.

NH29 nung KYO züngsem merenshiba aitsür: WAYO

Dimapur, June 21 (TYO): June 15, 2017 nü National Highway 29 nung prangpong amertemi Kiruphema Youth Organisation züngsem ka yirusüba aitsür, ta Western Angami Youth Organisation (WAYO)-i tanü sangdong ka nung metetdaksü.

Bushisüngdang asüba ajanga, KYO züngsemji anentsüh alua aliba tesem nung traffic ketdanglia, registration plate maliba SUV ka nung nisung ana aru aser tenati pai ashiba manga. Tenati KYO züngsem dang o tamajung shia merenshi aser tena rongnung nisung kati pistol

ka agiteter, tekolak nung pistol agi aiben ako ta angazükogo, ta WAYO-i sangdong nung shia lir.

NH29 nung anentsüh aluba aliba tesemtem nung senzusenbonger yarirtem dak yamai mapa tamajung inyakba ya nüji shisatsü alirtemi ajaki aitsüsü. WAYO-i iba inyakyim aitsür aser magizüker aser bangdak ketdangpurtem dang aibelenertem pua merenshitsü akhanger, ta WAYO tir Neidilhoutuo Sechü aser tongti tezülur Nijasielie Terhüja nati sangdong nung metetdaksü.

(Maneni tapak 12 nung...)

Kiralongrartemi Delhi amaksü akok

New Delhi, June 21 (Agencies): Intelligence Bureau ketdangsertemi kiralongrar 6-7 shi ka linük yimtiba nung kiralongra mapa inyaksü atema aruogo ta sangoksuba sülen Bodbarnü Delhi nung kümdangtsü osang

sangdongogo. Tanü 3 buba International Yoga Day amungba atema yimi nung security akangshia liasü.

Taküm May ita Laskar-e-Taiba (LeT) kiralongrar 20-21 shi ka linük nung tesemtem amaksü aita lir ta osang angazükba sülen Delhi Police-i kümdangtsü osang sangdonga liasü.

Delhi Police Special Cell-i tanü district, metro police aser railway police unit ajak dang shishilembadak, tamangba dak sendakba tesemtem, malls aser metro & railway stations ajak nung security akangshitsü indang osang sangoktsü.

Kiralongrar telokji Delhi, Mumbai, Rajasthan mesüra Punjab nung anenzüka alitsü akok ta police-isa temulung melemi bilemba osang ka metetdaksü.

Lendong ataloktsü akok ta ajitetba tesemtem nung PCR vans mapa lemezüksüogo aser item van gari nung National Security Guard-i training agütsüba drivers aser commandos lir.

Rajiv Pratap Rudy-i Dimapur nung International Yoga Day amung



June 21, 2017 nü North East Agri Expo Hall, Dimapur nung Union Minister for Skill Development & Entrepreneurship, Rajiv Pratap Rudy-i International Day of Yoga nung shilem agiba noksa nung angur.

Dimapur, June 21 (TYO): Union Minister of State (I/C) for Skill Development & Entrepreneurship, Rajiv Pratap Rudy-i Bodbarnü Dimapur nung International Yoga Day sentong nung shilem agi.

Prime Minister Modi-i akhi sobaliba aser temang anema alitsü atema 'Yog' yimya benshitsü ayongzükba indang tanü Rudy-ia nenshia metetdaksü.

Dimapur nung North East Agri Expo Hall, 4th mile nung yoga session ji ayongzükba agi. Iba sentongji The Art of Living

telok den Beauty and Wellness Sector Skill Council ajanga ketdangsuba agi aser Central Ministry, State Govt aser District Administration nungi ketdangsertem shilem agi.

Rudy-i ghonda ka jungnüa lanur 1000 shi den Yoga aiba sülen, "Yoga ya temang, tekolok aser tanüla meyoktepba inyakyim ka lir aser iba ya India nung akhidang tenzük" ta ashi.

Tanü asenok aliba alima nung asenok temang aser tekolok anema ayutsüla aser asenok

anisüngzüksü aser tekolok süngjemdaksüsü atema Yoga ya exercise tajung ka lir, ta paisa ashi.

Pai tuyuba ama tanü linük tesem balala nung Skill India kübok centre 100 ajanga Yoga sentongtem ayongzükba agir, ta Rudy-isa shisem.

Ministry of Skill Development and Entrepreneurship-i Yoga aser iba ajanga tajanzük agütsüba atema mapa ka tenzükogo. Iba skill angazükba ajanga nisung ka tashi aita dang masü saka tangar danga sayutetsü, ta paisa metetdaksü.

PWD-i Nagaland nung gari lenmangtem digitize asütsü: Swu

Kohima, June 21 (TYO): State renloktüsü atema lenmang tajung aser tesentaktep nungdaker aser iba atema Nagaland Public Works Department (Roads and Bridges)-i gari lenmang indang mapa digitise asür.

"Digitisation ajanga state nung aliba gari lenmangtem tia metetsü aser iba atema mapa tenzükogo" ta PWD (Roads and Bridges) Minister, Y Vikheho Swu-i ashi.

Kohima nung 'application of new materials in infrastructure development' indang shisatokden aser workshop ka nung o jembidang Swu-i iba osang metetdaksü.

Roads and Bridges ya department tongtipang ka lir saka state nung gari lenmangtem indang tia kanga mejungi lir. Tanü-asüing amshiba technology tem mamshira, infrastructure development nung aser talisa gari lenmang wadang nung mapa

takok ngua meinyaktetsü, ta paisa ashi.

Nagaland nung gari lenmangtemji tzüingluruwa ka dang süirbo raksar. Iba khuret angateta Department-i lenmang tajungba yanglutsü atema RoadCem (nano science for road construction) aser kilentzü atema Alcorr double wall corrugated pipes amshia yanglutsü, ta Swu-isa metetdaksü.

(Maneni tapak 11 nung...)

SSWBT aser Tata Trust-i kaketshir 80 nem scholarship agütsü



Raj Bhavan nung Angh PB Acharya-i kaketshir 80 nem stipend aser scholarship lema agütsüba sentong nung agiba noksa ka angur.

Kohima, June 21 (TYO): Tata Trusts-i parnok Corporate Social Responsibility nung shilem ka ama Sesoma Students' Welfare Trust (SSWBT) kübok kaketshir 80 nem sen lakh 7.6 stipend aser scholarship agütsü.

Bodbarnü Raj Bhavan nung Nagaland Angh, P B Acharya-i kaketshir 80 nem stipend aser scholarship lema agütsü.

Iba teyari ya Nagaland kübok

tesem balala nungi kaketshir 80 shia nem sen 9500 agütsüba lir.

SSWBT ya Kohima district kübok Khonoma nung Sesoma kidongi tentetba lir. Yimtsüing tia nung aliba kaketshirtem aser talisa tetsürtem elementary education nung teyari agütsüsü atema parnoki iba telok tentet, ta tanü sentong nung Secretary K Seyie-ia ashi.

2000 nungi SSWBT-i parnok

sasep nungi kaketshirtem yaritsü tenzük saka 2016 nungi Sir Dorabji Tata Trust nungi teyari angur aser ibaji ajanga kaketshirtem nem stipend aser scholarship agütsür, ta paisa metetdaksü.

Sentong nung Nagaland Angh, P B Acharya-i SSWBT Khonoma nem tenüngsang agütsü.

(Maneni tapak 12 nung...)

**NÜ VOTE AGI NAI
AGINÜBA AMA NÜ
T A K Ü M
YANGLUTSÜSA
NÜ NEM TASHI
AGÜTSÜR**



Mokokchung nung 'World Music Day' kanga longsoa mungogo



Mokokchung, June 21 (TYO): Mokokchung nung tang nüburtemi sapua tetshiba liso band den kija kentenertemi sabang agia Mokokchung nung June 21 nü 'World Music Day' sentong Cosmos Entertainment Hall nung kanga longsoatapa mungogo. Iba sentong ya Mokokchung District Musicians Association (MDMA)-i ayongzükba liasü.

Shilem agir band rongnung; Tune Up Channel, Onus, Beyond Sunday, Mingle Tones, Flamboyant Souls, Mannequin, Rag Dolls, Galaxy Stars, The Great Decade, Trans Ebullient, Class of Music, 4 of Us, Yimjung Ola, Hunting Boots

asero solo artist Lipokmenla, Imlisenla, Angangla, Longchameren, Arenla Lkr aser tangartemi sabang agia telok kanga longsoadaksü.

Tanü iba sentong nung tetushi tejaoker Mayangnokcha GHSS vice principal Lolenmayang-i MDMA-i adokba kensep ka sayatsü. WMD amungba den repsema ano MDMA-isa Junior Solo kenten tetoktepba sentong-a ka ayongzükba agiogo.

Music ajanga alima nung temelenshi jenti adokdaksür, yimji-yimjung bener arutsür, telungjem adokdaksür aser linük tsüngda apu latsür, ta tetushi tejaoker Mayang-i

metetdaksü.

Alima nung music telesa aika lir, aji oda, tangar indang music ajizüka atembaji dang masü saka pei meyong 'genre' tasen tenzüksüla, ta paisa ayongzükba liasü.

Taküm Junior Solo tetoktepba nung Kr. Anenla Jamir-i mezüngbuba jenjang angu aser tanabuba aser tasembuba jenjang nung Kr. Imlichila aser Kr. Süneprungla Kichu na liasü.

Junior solo tetoktepba nung takoker angu shia nem Chord Music Store-i gift hampers renemtsü aser Resonate Studio-i recording contract agütsüsü, ta angazükba.

Mkg nung English jembiba aser ola adokren sayuba class tenzüksü

Mokokchung, June 21 (TYO): Mokokchung atema osang tajung kaji July 1, 2017 nungi 'Speak Up' ta sür TreeHouse School den külemi English jembiba aser ola adokbaren (Spoken English & Phonetics) sayuba class tenzüksü.

Iba class-ji tongtibangsa mapa balala inyaker (working professionals), kinüngtsütem, kakatshir aser tejangrartem atema lapoker. Iba course nung

talisa oshiooben lesson-tem, nisung ka nübusen rendaksüba aser mapa balala bushidang jembishinütsü tasatem sayutsü.

Iba class nung shisalen sayurtemji; Arenla Lemtur (B.A & PG Print Media) aser Aren Changkiri (M.A Linguistics) na alitsü. "Iba tesayuba tenzükba ajanga nisungtemi English shitak jembiba den ola timi adokteta jembiba tasa angazüksü imlar," ta iba osangbeneri Aren Changkiri

asero Arenla Lemtur na den jembidang ashi.

Iba course-ji ita asem atema asütsü aser ibaji nikongdang 2:00 ako nung shift ka aser 4:00 ako nung shift ta lemsar agütsü. Tejangrar dang lira kakatshirtem atema meyi sodi mapang crash course agütsüsü mulunga lir, ta parnokisa ashi.

Kari danga iba dak sendakba nung osang tejangja metetnura phone number 9856853023 nung tongteprateptsü akok.

State nunga 3buba International Day of Yoga mungogo

Kohima, June 21 (TYO): Stadium Kohima nung amung, Tanü Nagaland nunga 3rd International Yoga Day anogomung "Yoga for Harmony and Peace" omen nung ajemdaker mungogo.

Iba anogomung tongti sentongji Youth Resources & Sports-i ayongzükba Indira Gandhi

Stadium Kohima nung amung, aser iba sentong nung arishi küm 86 tain Nagaland Angh, P B Acharya-i anir nisung noklang aikati yoga ia liasü.

Iba sentong nung shilem agirtem rongnung National Service Scheme, National Cadet Corps, Assam Rifles,

Nehru Yuva Kendra Sangathan, Bharat Scouts & Guides, National Ayush Mission Nagaland, Patanjali Yog Samiti, Kohima, Indira Gandhi Academy, Kohima aser sorkar ketdangsertem dena liasü.

Tesüsa menüba exercise agia iba sentong tembanga liasü.



Kohima, June 21, 2017: June 21, 2017 nü CRPF indang 78buba Battalion-i 3buba International Yoga Day amungdang tangokba noksa nung angur. Unit Head Quarters, Zubza nung Special Yoga Camps amenok, iba den külemi Battalion indang sub units aliba districts- Kohima, Dimapur aser Mokokchung nunga ketdangsertem, sepaitem aser parnok kibongtemi kanga jangrabangraa Yoga shilem agiogo. Sentong nungsa sepaitem dang Yoga ajanga temang aser shisatsü naprong anema lidaksüba aser taküm nung shisabulu ajemdaksüba tajangzüktem indang metetdakja liasü.



OFFICE OF THE DIMAPUR AKHOYA FELLOWSHIP "SENSO SHIA TSÜNGREM DEN TIMSÜR KAKA" SARASADEM AYONGZÜKER

Dimapur Akhoya Fellowship ajanga June 24, 2017 anepdang 6:00 Ako nungi 9:00 Ako tashi sarasadem sentong renema lir, anungji iba sentong nung senso aser anükapang ajaki sarasadema shilem tajung agütsü ayongzükba.

Tesentepdak: NCRRC Tenlaki,
Half Nagarjan, Dimapur.

Dimapur nung Reality Show audition agütsü

Dimapur, June 21 (TYO): Balaji group of companies unit, The Banktash Cine Vision Private Limited-i parnok indang reality show tasentiba, India's Big Superstar atema June 24, 2017 anepdang 9:00 ako nungi Pranabananda Women's College, Dimapur nung audition agütsü.

Producer, Manoj Gupta-i, iba show ya telesa pezü- acting, singing, dancing aser instrumental music nung agütsü, aser iba nungji arishi küm 10 nungi arishi küm 30 tsüngdapurtemi shilem agitettsü, ta metetdaksü.

Pai ashiba agi, iba ya ajanga northeast nung sempet alirtem atema sabang ka agütsüsü aser Indian film industry nunga shilem agütsü atema maongka angütsü.

Iba show tetendangertemji nungtugu nisungtem asütsü.

Osang tejangja www.indiasbigsuperstart.com nung angütsü, iba den külemi email : info@indiasbiguperstar.com ajanga tongteprateptsü akok mesüra 7086 887717 | 7086 888937 | 7086 889979 | 7086 887769 ajanga metetpelatsü akok.



Dimapur, June 21, 2017: Assistant NCC Officer Lt. Watisenla leniba nung Dimapur Government College nungi NCC Unit-i June 17, 2017 nü Purana Bazar nung aliba divider (Zion Hospital junction) merüktetba den külemi süngdong atemba mapang tangokba noksa kar angur. 'Greener and Cleaner Dimapur' tayongzükba nung ajemdaker NCC Cadet temi gari lenmang nung divider merüktet aser süngdong temja liasü. NCC züngsemtem den külemi Dimapur Government College nungi Assistant Professors- Moamongla Aier, Dr. Benjongkumba Imchen aser Dr. Maongkala Longchar nungeria shilem agia liasü. Iba sentong atema Y. Along Aier-i Foxtail palms aser golden pine süngdongtem tenla agüja liasü. Jana indokba maparen nung CEO, DMC-i yaritepba atema parnoki pa dang pelaba lemsatepogo.

Kohima LBC-i Tebutem anogo amung

Kohima June 21 (TYO): June 18, 2017 nü Kohima Liangmai Baptist Church-i Tebutem anogo among, aser iba sentong nung Liangmai Baptist Association (LBA) Women Department Tir, Akengiu shisalen sayur liasü.

Sentong nung jembidang Akengiu-i, tebutemji kibong nung walunirtem lir aser tebutemi kibong nung temelung lemtetdaksür, ta ashi.

"Tebutemji tamang katetba tembartem lir aser tesangwa sayurtem lir. Iba anogomung nung asenoki parnok dang temeim sayua akhüm agütsüsüla," ta laisa ashi.

Kohima Liangmai Baptist Church Women Department-isa iba sentong nung adener tebutem shia nem sempet agüja liasü.

Iba sentong ya LBA Women Department General Secretary, Tawangliu leniba nung agia liasü.

ADC (Planning) Kohima sangdong

Kohima, June 21 (TYO): DPDB Conference hall ADC Planning & Member Secretary DPDB Kohima, Ketoho Luho-i sangdong ka ajanga, LADP -2017-18 Schemes atema telemtetba agütsü asoshi July 4, 2017 anepdang 10:30 ako nungi

DPDB Conference hall Kohima nung Special DPDB senden ka amentsü, ta metetdaksü.

Paisa Kohima DPDB züngsem ajak dang iba senden nung medema adentsü mepishia metetdaksüogo.

GST July 1, 2017 nungi tenzüksü



GST kibong shia atema temoatsü ka



GST @ 0%

SARU KA DANG AGÜTSÜBA AJANGA KI OSET TIMBA
KA NUNG JENJANG TAJEMBA AKÜMTSÜ



GST @ 5%



GST @ 12%



GST @ 18%



- ☛ Unpacked Foodgrains
- ☛ Fresh Vegetables
- ☛ Unbranded Atta
- ☛ Unbranded Maida
- ☛ Unbranded Besan
- ☛ Gur
- ☛ Milk
- ☛ Eggs
- ☛ Card
- ☛ Laxol
- ☛ Unpacked Paneer
- ☛ Unbranded Natural Honey
- ☛ Prasad
- ☛ Palmyra Jaggery
- ☛ Salt
- ☛ Kajal
- ☛ Phool Bhari Jhadoo
- ☛ Children's Drawing and Colouring Books
- ☛ Education Services
- ☛ Health Services

- ☛ Sugar
- ☛ Tea
- ☛ Roasted Coffee Beans
- ☛ Edible Oils
- ☛ Skimmed Milk Powder
- ☛ Milk Food for Babies
- ☛ Packed Paneer
- ☛ Cashew Nuts
- ☛ Raisin
- ☛ PDS Kerosene
- ☛ Domestic LPG
- ☛ Footwear (upto ₹ 500)
- ☛ Apparels (upto ₹ 1,000)
- ☛ Agarbatti
- ☛ Coir Mats, Matting and Floor Covering

- ☛ Butter
- ☛ Ghee
- ☛ Almonds
- ☛ Fruit Juice
- ☛ Packed Coconut Water
- ☛ Preparations of Vegetables, Fruits, Nuts or other parts of Plants including Pickle
- ☛ Murabba, Chutney, Jam, Jelly
- ☛ Umbrella
- ☛ Mobiles

- ☛ Hair Oil
- ☛ Toothpaste
- ☛ Soap
- ☛ Pasta
- ☛ Corn Flakes
- ☛ Soups
- ☛ Ice-cream
- ☛ Toiletries
- ☛ Computers
- ☛ Printers

OSETTSÜSET/CHIYONGTSÜ SHILEM 81 BO GST SARU SHILEM 18 TEKÜBOK ASÜTSÜ



Tweet us at @askGST_GoI for any GST related query



Central Board of Excise and Customs &
Commercial Taxes Departments of States/Union Territories
www.cbec.gov.in



TIR YIMYIM

YIMOBILEM (EDITORIAL)

DIMAPUR THURSDAY, JUNE 22, 2017

Saru agi timtem agütsüba

Nagaland nung linük tenzükertem telok balalai saru saruba agi terenlok mapa meinyaktet Nagaland rajang kümdaktsüba ya tesasatsüka aser tejashitsüka lir. Jungjunga bilemdangdi süra koba yimten aser telok südir süaka saru mesaruang taküm melitetsü, ibayongji government-ia tax agir aser lokti tentet asoshia züngsem saru aser kilen saru den lokti nungdak asoshi saru sarupet sarur. Item ajakji yimten aser lokti ajungtsü asoshi sarur, anungji yimten aser lokti saru saruba ajanga alima telongi malutsüla aser nübortem timmatemtsüla. Ajisüaka, Nagaland nungbo yamaji masü. Linük tenzükertemi saru saruba ajanga gari lenmanga meyanglutetsüsa akümbaji asenok asoshi takoksa dang masü saka alima tsüngdang nungku bentetter. Aji oda, taoba hopta nung Dimapur aser Kohima tsüngda 4 lane yanglur company dang Naga nungter telong nung alir telok kati saru magütsüra mapa meinyaki anendaktsütsü ta amokmerenbaji Naga nungter ajak asoshi tia majung asütsü. Atangji, saru memeshiyonga Nagaland nung mapa inyaker contractor-tem aikati pei lima meimba shisatsü agi mapa meinyaker. Aji oda, senotsü tajangzük angutsü dang bilema inyakba agi government senbo aika endoker saka mapa shitak meinyaker. Iba jagi Nagaland nung gari lenmang nung black topping aoba ya ita ishika tsüngda menüngsaa aor. Ibaji dang masü saka Nagaland nung kiojen kata shitak merenemtetter aser government-i inyakba mapa ajak nung jenjang dalangba apia oset tamajung bendena yangluba teimba asütsü. Item ajakji telongpurtemi saru saruba nem nungloktsütsü. Ajisüaka, telong nung alirtem dang nungibo tema nung alir tulurtem aser ketdangsertem saru tuluba aser teimba agütsütsüsa akümer. Iba jagi mapa junga inyaknyuyonga contractor-tem asoshia timtem aika ajurur. Tanü asen lima mainba kuli aser timtemji itemji lir. Shidi asünungbo, telongpurtem ya Nagaland nung dang masü saka India ajunga nung lir. Ajisüaka, tangarbo alimabo kecha timtem melii renloknyonga aor. Imphal yimti ya Nagaland nung Dimapur aser Kohima ajanga nungdak osettem bena terenlok mapa inyaker. Aji oda, asenoki bilemstü agi Imphal yimti ya Kohima dang nungi kanga agia teküpbokba jenjang nung merenlokteti alitsü amai bilemer. Ajisüaka, Kohima nungi Imphal yimti atongdang aoksar, kechiyong Imphal yimti renlokbaji Nagaland denbo medemdangtsüla masü, Delhi amai dang lir. Asenoki metettsüba kaji Manipur nung telongpur telok 20 dak tema lir aser parnok ajak jagi saru meshia alitsü. Ajisüaka, terenlok mapa nungbo makoksadaktsür. Aji oda, saru liang teli, shibai inyakdir inyakaka oset shitak amshia mapa shitak inyakdaktsür, kechiyong ibaji nübortem sen agi nübortem asoshi yanglur. Iba tangatetba nung ano tang Mariani aser Mokokchung na tsüngda gari lenmang yanglutsüba maparen nung yimtsüngtem longjemer shinga nema saru mesarudaktsütsü aser alimelena kecha magitsü saka mapa-ang shitak inyakdaktsütsü ta telemtetba agibaji shitak agiogo. Iba kasa telemtetbaji Changtongya aser Longleng lenmang asoshia ali kiburtemi aginung jungla ta bilemer. Atangji, alimelen (land compensation) agiba agi contractortem makoksar, kechiyong ibaji mapa dakji keta lir aser center government-i agütsür. Ajisüaka, aiben asenoki alimelena magir aser mapa-a shitak inyak meinyak ibajia merepranger, anungji nübortem kanga akoksar. Iba amaji Amguri aser Mokokchung lenmang yangluba nunga atalokba angur. Aji oda, tang nungibo linük tenzükertemia saru saruba agi terenlok mapa anentsüsa meinyaktsüla aser tema nung alir tulur aser yimsüsürtemia 'commission' magitsüla aser contractor-temia tajangzük arishia masü saka pei lima meimba shisatsü agi 'nie yangluba aser inyakba mapasa tajungba asütsü,' ta asüba tangatetba nung inyaktsüla. Saru meshitsü melen mapa shitak inyakdakjang aser commission agitsü melen asen lima topur junga renlokakjang. Aji oda, nübortem asoshi terenlok mapa inyaktsüba sen nungi sen crore ishika saru meshir mesüra commission agir ki ka yanglutsü agibo, ali ka alitsü agibo mesüra election-i aitsü agibo ochishia Nagaland-ang tasen küma yanglutsüla.

OLEMSABANG

Taremsük- Patience

- Mrs. Meyisongla, Rtd. Deputy Director, Nursing khm

Taremsük ya naro ka lir koba ajak tsüki nungbo maponger. "Patience is a flower which do not grows in everybody garden."

Taremsük ya tanüla sempet rongnung kanga tongtipang ka lir. Saka nisung ajak dakbo taremsük mali. (The quality of being able calmly to endure suffering, toil, sustaining pain). Taremsükji shisa talangertemi dang mapang ajak nung aremsüker parnok asadanger, angateter bilemdanger aser aremsüker. Lipok 37. Yakob (Israel)er japaso 12 rongnung Yosef 11 buba liasü. Pa ajak nung tetemsü aser ajemalur. Tebui pa kanga tali meim. Iba jagi tedi (brothers) nungertemi pa majinü aser kanga sempa. Yosefi pungmang ka pongmang. Parnok ajak alu nung tsükpong langya liasü aser Yosefi alangba tsükpongji indang indanga nokdak aser tedi nungter tsükpongi Yosef tsükpong meketa nokdak aser parnok apudaka külem. Ano Yosefisa tanaben pungmang ka pongmang, iba pongmang nung ita, anü aser petinu terkati pa madang apudak. Iba atema tedi nungertemi pa dak tenük kanga merem aser sempa aser pa Ishmael nungter dang ayok. Aser pa Ijip limai anir oa Farao chuba anüker arkotong Potifar dang ayok. Küm aika süia or, alima nung ayawara tuluka aru. Idangji Yosef tedi nungter par ter (10) Ijipi tsük alii aru. Yangji Yosef Ijip rongsen ajak madak kibur kumer alima ajak nungi tsük alie arurtem dang tsük yokya liasü. Idangji pa tedi nungter arua Yosef tsüngdang apudak. Parnokibo Yosef majitet saka Yosefibo tedi nonger ajitet. Idangji Yosefi pai akhidang pungmangba to bilemtet. Lipok 42:24. Yosefi parnok toktsür oa ajeptsü tenzük saka pai parnok dangi arua tanaben jembi. Lipok 3:26. kodang Yosefi Benjamen angu aria bilem. 3:26 Parnoki pa matsüngdang apudak. Yosefi pai akhidang pungmangba tosa bilemtet. Pai tedi nungter dang aria bilem, parnok dang temeim aser taremsük tulu sayu. Taremsük melira, temeim, tepela, tesünep, kümli tajung, ajemalu aser peisasa azüokbaji kodanga tapensa masü. Aluyimer alu junga meyimtettsü, school azüngertemi takok tajung kodanga mangutsü asük asa arema, yakta sakaa lesson azüngtsüla, terabo menua lesson azüngtsüla mesüra junga takok mangutsü.

Azümongshi ya kanga tekera shiruru ka lir. Aser kerai (tortoise) onsa anüa jajar. Tena asemteptsü jazük. Azümongshi kanga kara asema orr len tom nong mejang, saka kerai maneni aremsüka jajaa alizüngji pai tama atong. Iba dangji taremsük süngjang ta ajar. Ninang kati mojitsü spoon ka bendentsü naro 4000-5000 semdanga mojitsü bendener. Ken mapang ka nung asangur kati tula ka arütsü agütsü, saka tulaji pai aginüba ama marüetji pa kanga jashir, tulaji kenji kati mejipsa, aser sü arüsang dak kanji jagi atsüng. Iba atema rongrong kanga tuluka adok aser olulu agi town sünga prokshi. Kin ana tsüngda raratep tulu adok. Nisung aika timtem tulu ajuru, taremsük maliba lendongji yamaji lir. Efesa 4:1 talangka aremsükba agi temeim nung medemer o medemer na azüüktepa aser tesünep talenba nung tanüla telongjem agutsü meranga, koba ajaba agi nenok aja iba ajaba temsüa jajatsü nenok dang ni mepishir. Yakob. 1:3 nenok tamang atidangba agi taremsük adokdaktsür. 19th century nung asangur chanu ka molungjang nung pa kakat zülur ka kümnü. Pa dak iba sempet keta liasü. Saka tia maka, pa class 5 nung azüngdang tebu (father) sentsü yong küm pezü jail nung puoka ayu. Teyari maka pa schooli moutet, anungji kanga yaseta timtema senzü. Tesülen koya mesüba ki ka nung bottle nung label maloktsü mapa angu. Yangji inyaka pa aya anen. Pai aiben paibo kecha meimyaktettsü ta bilem. Pai article ka zülur agütsü saka magizük. Tanaben tasemben yamaji zülüka magizük. Tesüsa pai anosa articleji zülur, shingaia mangudang ayaterem nung post office-i orr ibaji post asü. Iba article Editor jagi junger ta agizüka ayu. Ibai pa atema tesangwa window lapokbaji liasü. Pa kanga pelaa tasü itshi aser pasasa pa dak tamang aka. Tesülen pa kanga nungtugu kakat zülur ka aküm. Taremsük süngjangji tepela aser temoatsü. Pai maremsük asübo pa yamaji tepetzük tia nungi kanga akümket nungtugu nisung mekümla. Paji Charles Dicken, England nungter. Meranga inyakbaji ayipjanga mejangtsü mozü tajungtibaji lir. Ayipjanga mejangra pelaa anema alir.

Korea tsür Myo-buni. Tanur matamabensar "cerebral palsy" tanur ka aso, temang tulu o mejembitetter, menokdakteter, saka tekolok kanga tajung tanur ka liasü. Korea nung matamabensarbo junga alir tanur azüngdak school nung külemi mezüngdaktsür, saka Myo-buni par japaso tanur tajungtem azüngdak dang kanga züngdaktsünüji, lai school seatji asüngdangjen asüngdang nung tesayuri pai tangar tanur meyurütsülima ta asüngdang, masü ni pa junga anüksü, nenoki pa window ka anasa mendakjang aser table pa atema balaka tuluka agüjang ta ashi tesayurtemi yamaji inyak. Lar yimdak nungi schoolji kilometre 30 liasü. Anepdang shia lai tanurji süloka ponger school jagi aor, anogo tepiyong window-bang nung nokdaker lar japaso pencil tsükdang shia arua agütsü, chiyongtsü chiyongdakja, metsümeshilen anir senzüa yarir class temer ano lar japasoji ponger kidangi oli ta kanga taremsük agi School azüng tepiyong yamaji aremsüka class 10 pass asü. Ano Seoul National University nung master degree agir, pa yangji mathematics tutorial mapa Seoul National University nung inyaktsü maongka agütsü. May ita 1994 küm Mr. Yongjung aser pa kinungtsü Myo-buni tena nem Seoul sejong cultural centre nung "PARENT OF THE YEAR" ta zülur tetushi tulu agütsü. Iba benjong nung President Kim yong sam aser Prime minister Lee-yong duck tenati certificate tajung Hun-ki nem agüja tushi. Pa cerebral palsy aketer mezüng school junga züngteter liasü. Pa sülenbo pa ama cerebral palsy aketer nema school seat agüja Seoul nung züngdaktsür. Myo-buni taremsük agi lar tesopet japaso ka junga alir tanur aika ajateta züngdaktsüba konangji alimai kanga pelaa züngshir. TAREMZUK-VALUE

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

KHRISTAN TAKÜM NUNG TONGPANG RARA

~ L.Kika Pongener Aoyimkum, Dimapur.

(Taoba adok nungi...)

Yisu iba alimai arubaji ochi o tiyazü na, aser tajung o tamajung na tsüngda raratsü asoshi aru, aser Yisui iba tiyazü aser tamajung madak takok nguogo. Sürabangla asenoki-a iba ana rongnungji kobala nem kokdaksür ??? Arogo, yimden loktiliba, kibong, aser kija taküm nung kodang mapa tajung ka inyaksü sentong adongdir, idangji teti temeneni jangjung aser Tsüngremi mulongba ama masü, saka tashi akar, rongsen akar, tashitemeteter, shisa akar nem kokdaksür. Yimden yimli nung süaka, arogo nung süaka, aser lokti balala nung süaka, tenzüker kar langka tajangzük angutsü meji, lenir kar yangku asüngtsu meji, nisung kar tenzüker menden tajung atatsü meji, tashiyim agi inyaktepdang aiben Tsüngremi mulongba ama meinyakteter aser Tsüngrem sentong matalokdaksür. Aiben asenok Khristan tamanger tajungtemi ochiba sülen masü, saka tashi akar, rongsen akar, shisa akar sülen anidaker teimba asür, aser idangji tamajungba nemji atsür yoker aser kodaksür. Kechiaser Tsüngremi memulongba mapa nungjibo teti sübokrem, tajangzük, chidiyungdi aser tashiyim dena lir, aser item nungji Khristan tamanger tajungtem aika metsüdaker alanger. Aiben asenok tamangertemi meshidakba mapatemji-ang shidakba, aser ochi ama reprangteter aser angateter inyaksüsa tensa mapang-a ajurur, kechiaser aiben nisunger temesüzükba o tanang agi tamanger tajung aika anisadaksür. Api.Shin-21:2. "Nisunger lenmang shiaji pei nükdangbo shidak lir, saka Kibubai temulongjang odanger". Aji oda, asenoki asen tenük dang shidak mesükba mapa nung masü, mesüra aseni shidak amai bilemba mapatem nung masü, saka Tsüngrem tsüngdang shidak asüba mapatem inyaksü merangdi. A.Shin-4:14-15. Tamajungler lenmangi teyi, aser temeneni nisungtem lenmang nung tejaja. Aji paitokang aser idakji tejaja. Aji nungi meyipang aser süia oang. Aji oda, aiben dang asenoki nisunger temesüzükba sülen anidaka metetsümonga meshidak inyaker atar. Efesa-6:12. nungji zünga "Kechiaser asenoki shi aser azü anema memelangteper, saka tongtipangtem anema, aintem anema, iba amming lima yimsürtem anema, anüng tema nung tanela tamajungtem anema melangteper". Anogo shia Khristan taküm kati nunga ta meshitetsüsa, mesüra mah ta meshitetsüsa tazütapongtsü, tenükshitsü tatidangtem jenti dang ajurur. Ashiko karbo Tsüngrem tanela tetuyuba den mesükteper shinba o-tem agi mesüzüktsüa akok, tiyazü tesayubatem asütsü akok. Anungji asenoki laishiba den medemdanga Tsüngrem o bushia aser maneni sarasadema agi item tongpangtemji akoktsü merangtsüla. Tanü asen aliba putu nung alima putipuyang, sangrasangji, tazütapongtsü mapatem jenti agi asenok anogo shia tamajungleni anir aotsüsa, sang aika dang mesanga yua lir. Internet, Facebook, WhatsApp, Television, Mobile phone, Mass media etc. Item nung ya tajung-a aika lir, asenok asoshi tajangzük aika agütsür aser anisüngzük angur, saka ano asenok tamangba Tanela jenjang mashileni anir aotsüsa shidak mesüker, mapa tajung amai, saka meshidak aika dang lir. Anungji item nungi jenbua alitsü asoshi Tsüngrem o tarok bushitsüla. Efesa-6:14-17. Anungji nenoki ochi agi nangri kanger temeshiba merang semoktsü teku nung semokang. Aser tekümtet merang korang aser Tanela nok koba Tsüngrem o lir itemji agiang. Iba tongpang raraji akoktsü asoshi hadirji itemji lir, anungji item sübotsüji abensaa sübo nungdang asenoki iba raraji akoktsü. Ano idakji chia asenok tamangertem atema tongpang rara tesashibaji election tongpang ya asütsü. Election dak sendakba tongpang rara nungji yi tongpang, sen tongpang, tashiyim tongpang, azü tokshiba tongpang, süpokrem tongpang, chidiyungdi tongpang, ano aika dang lir, item ajakji tamang takang, ochi tamang aser Tsüngrem o agi dang akoktsü. Tenyar Paul-i ashi, "Ni rara tajungji raraogo, ni alizüng tonga asemogo, ni tamangji yuogo". Paul-i item tamang tongpang ajak anema rarar takok anguba, koba kuli tajung asenok amangbapurtem dangi zülüogo, iba amaji asenoki anogo shia iba tongpang rara takok angutsü asoshi meranga raradi. Tsüngremi iba o ajanga tazünger ajak moajangma.

Chakpa Baptist Arogo nung "Summer youth Crusade" agi



Mokokchung, June 20 (TYO): tashi "Summer youth worship tanir Temjen aser Chakpa Baptist Arogo nung Crusade" ka katsüogo, ta Shalom Prayer Cell nungi aliba amangbapur ajaki kanga sangdong ka ajanga yongyaseta sarasadema ataba metetdaksü. Iba sentong nung ama Ungma Baptist Arogo Tsüngrem o jembir Among Shalom Prayer Cell nungi par (missionary), counselor teloki chiyungtsu aser nungdakba oset ajak peria Shenden Lkr aser kinungtsü bener arua June 16 nungi 18 Rongsenla den praise & metetdaksü.

ANO GO ABEN TSÜNGREM DEN

GETHSEMANE : LUKE 22:39-46

Atangji ibai Temeshi nung Temeshitiba! Asenoki aputaker "Kibuba matsüngdang ola matoki alibaji asenok asoshi tajung lir." Süngjem, süngjema mener taoksatasü o," iba marok ni nungi agienang!" ta ashiba o ji angatsüla. Aser ni tezüpa yimsü nung mangatsüla. Iba atsüki nung shidakba jenjangji metetta akümer. Gethsemane nung mener shingaia shinga jenjang makaba tamakitsü tanela mangazüktsü.

"Kotak tenyar ka anüng nungi pa dangi adok aser pa tashi itdaksür." Ni iba tenyarji metet! Pa kü dangi adok. Pai kü dangi kotaker chiyongtsü bener aru, kotaker manna. Teti aser ajaklen, kodang ni Kibubai mulongba nem bendanga agütsür, tenyarji arur aser kü tanela tashi itdaksür. Pei jangraba yutsüba tetezü Tsüngrem agizükba lir. Ni kü tejangraba metoktsü tashi Tsüngrem kü dangi arutsü makok.

Kodang ni mulongba toktsür ni tatem makabaji ajangzük. Ni bendanga agütsüba secondji takok anguba second lir. Kodang ni kü tashi mait meshitetdir, ni tashi sobur aser Tamarener ama sobua alir.

Aser kodang sarasadem nungi noktak, idangji kechi? Ibai dang, Pa kechisarena asoshi renema liasü, tashioktsüba mesepba, kangki nung metatsü asoshi. "Sakaang, asenoki apusodi".



June 18, 2017 nü Mongsenyimti Baptist Arogo nung tebutem nem tetushi agüja "Tebutem Anogo" meraketa aser temoatsü ngua amungba den Rev. Dr. T. Lima Ozükum, Mongsenyimti Senso Missionary-i züluba "SHILUA BILEM" kaket tajung ka Mongsenyimti Baptist Arogo sannüker Imli Ozükum-i Tsüngrem tenüngsanga sayatsüba angur. Iba kaket nung Mongsenyimti yim kümer putu balala melentepa lia arudang tensa tapu balala tsüraburtemi ajangshia aruba tatalokbatem oda temungratsüka aser jangratemtsüka zülua lir.

Chubatsür Elizabeth-i Keith Getty nem sempet agütsü

London, June 21 (Agencies): England Chubatsür Elizabeth II-i tan hopta osangtajung ken zülur Keith Getty nem 'Officer of the Order of the British Empire' naroküm agütsüogo.

Getty-i "Music and Modern Hymn Writing" nung shilem tajung agiba ajiteta iba naroküm agütsü. Tang mezüng atema contemporary church music nungi nisung ka nem iba sempet agütsür, ta CharismaNews.com ajanga metetdaksü.

"Ni iba osang mezüng angashidang kanga aoksa. America nung British nunger ka ama liyonga arudang, kü nem iba sempet agütsüba ta tesüngmangtsü ka lir. Osangtajung ken züluba ajitetba atema ni kanga pelar. Ni U.K nungi lir aser osangtajung ken züluba senmang ajiteta kü nem sempet agütsüba atema ni Chubatsür dang kanga pelar" ta Getty-i ashi.

Getty aser collaborator Stuart Townend nati "In Christ Alone" kenjang zülü aser iba ya



United Kingdom nung nüngtugu hymn rongnung mezüngbuba lir. United States nunga iba ken ya tematiba 10 nung züngsema lir. Getty-i pa kinungtsü aser tanga kenzülurtem den ken 60 den tema zülüogo aser parnoki züluba kentemji United States o United Kingdom nung kanga sapua atener.

Taküm küm tatemlen Getty aser pa kinungtsü nati Sing! ta ser campaign ka tenzüksü aser iba asoshi Nashville nung mungdang ka alitsü. Tenatisa 'Sing! How Worship Transforms Your Life, Family and Church' ta ser kaket ka sayatsü.

OLONG PAITEP # 4459

1		2				3		4		5
6								7		
					8			9		10
		11								
12										
				13				14		
15				16						
						17				

RIPLEN

- 1. Ochi masü - 5
- 6. Temang mejungi aküm - 7
- 7. Rong yanglusang - 3
- 9. Yimer alidak - 3
- 11. Tebendang - 7
- 12. Anogo semer ka - 3
- 15. Tenüng atet - 3
- 16. Temang nungi aluba tzü - 7
- 17. Teki - 5

LANGTSÜNGLEN

- 2. Shisadanger - 4
- 3. Shiruru apuba - 4
- 4. Mozü süngdong - 6
- 5. T _ _ _ ng - 3
- 6. Kechaia malizüktet - 5
- 8. Tsük bendena ayudak - 3
- 10. Nüma metangtetba mapa - 5
- 11. Jenjang tanela - 6
- 13. Sentong - 4
- 14. Mi apudak - 4
- 15. Nünü-er jala - 3


OLONG PAITEP # 4458 TELANGZÜBA

TIPLÉN :

- 1. Karanur, 5. Entsü, 6. Lah, 9. Agi,
- 11. Arong, 12. Ain, 13. Tasen, 14. Oru,
- 17. Ati, 18. Kensü, 19. Khrista.

LANGTSÜNGLEN :

- 2. Amang, 3. Repranger, 4. Asa,
- 7. Tajangzük, 8. Soro, 10. Itsü,
- 15. Ratet, 16. Sen.



ALOKBAI PEI KINUNGTSÜ MEREPRANGTET-I AIA-ADOK

- Alokba** : Hai talakba... Asen kidang tetsür kou temuro ser tekirak aser sentsü tera nakremnakrem'er ka mena aliba ya shiba ? Negro-tsür masü südi ??? !!!
- Jabaso** : Waaammaa... oba aji ojala ako... Na kodaser ojala aia-adoker...!!! Parnok telok bank nungi loan agizükba sen merijang ishi-shi lemsaba, iba sen jagi parlour nung oa kou rong merem merema nüshir... kou kirakkiraka yanglur nikongdang menur-ang kidangi shilang ako...hii...hiii...
- Warakla** : Hai samesaba... Nebu dang mashitsüla o mashi mashi kecha teshima no... ni nebu nenok amai third class masü ako... onok ya century-21buba nung alir akodii... Tanü putu den apet fashion yangluba adii... sssaaalllaaa...
- Alokba** : Ayyaaooo... tetsübutüsü adii... ni küla ya Africa tsür alima sema senzür kar lenmang ayir asen kidangi nemküta atu asütsüa ta bilem'ar... teeerrreeeka... tang tanur school fee magütsü ayu... tanur anishiba auto para magütsü.... jangbongbo tazung... Pi tangar takar-tulur mim-saheb nunger fashion tapu tapu yanglutsü... Na aji jilu benshir... iba loan sentsühjibo ni maotsütsü... Na kolen nungi aotsü'ar aodokangma no... Tuuufffaaaii... Sssaaalllaaa...
-I. Kika Pongener, Aoyimkü, Dimapur.

TANÜBO NAI LANGZÜANG

- Q. Mezüngbuba BRICS Games 2017 asayamung koba linük asaya liasü ?
- [A] South Africa [B] Russia
- [C] China [D] Brazil

=====(Taruba adok nung onoki langzüksü)

YASHI ADOK TELANGZÜBA : Bhutan

Tepela Tasoba Anogo



Tanur asoba anogo nung salem osang den noksa angari adokdaksünürä - Tenüng, Küm, School, Talidak & salem osang tejanga züur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimym bureau tem nung apujang.

1. Tenüng : _____

2. Tasoba anogo: _____

3. Küm : _____ 4. Class : _____

5. School : _____

6. Talidak : _____

7. Salem osang : _____

NAIA YA METETER MA



Teburtemi longpant sepzüka asema yimya ya mezüngbo tepuokdak alirtemi tepuokdak parnok den shi nung medemtsü atema nebu peria lir ta tamaitsü sayutsü atema yamajisa sepkzüka semer senzü. Ajisüaka, 1990's mapang iba longpant asema yimya ya fashion ka ama kümadok. Lanurtemi iba fashion ya kanga sapua agizüka longpant asemtsü tenzük saka ano telok aikati iba yimya ya nokdangtsü merang. 2005 February ita United States nung Virginia House of Delegates-i telung nung asema sübotsü sayua asemertem dang sen \$50 senchi achitsü ozüng yanglu. Ano, 2004 May ita nunga Louisiana nung yimsüsürtemi yimjak nung telung nung asema sübotsü sayua süoshi magitsü atema House Bill 1626 ozüng yanglu. Ajisüaka, tanü asüng lanurtemi longpant sepzüka asema yimya ya kanga bulua ajizüktepa asemer.

SUDOKU # 3561

2	6			4	
6	8	3	2	7	
	7	3		9	6
3	6		4		
2		1	6	7	5
	7		9	2	1
		9	6		8
	5		4		
	6		2	4	

TELANGZÜBA # 3562

3	8	1	4	6	2	9	5	7
4	9	7	5	8	1	2	6	3
2	5	6	7	9	3	1	8	4
9	7	5	6	2	8	3	4	1
6	4	3	1	7	9	8	2	5
8	1	2	3	4	5	7	9	6
7	2	4	8	3	6	5	1	9
1	6	9	2	5	7	4	3	8
5	3	8	9	1	4	6	7	2

OJANG LUTEP # 4066

- RGAI : □□□□
- ZÜTETSENTSÜSA : □□□□□□□□□□
- NMALENG : □□□□□□□□
- RKA : □□□
- ANDGA : □□□□□
- ALNAGAND : □□□□□□□□
- UNNG : □□□□
- LAIR : □□□□
- DAKO : □□□□
- NGJULA : □□□□□□

OJANG LUTEP TELANGZÜBA # 4065

TEBUTEM MESÜRA TETSÜTEM ANOGOMONG NUNG SEMPET TILALABOSA SEMPETTSÜ NUNGBO JUNGLA

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



Aries
21/3-19/4

Tanü na tangar dak nungi alakteta kümdangshitsü nüngdaker. Nü dak nü sasa temolung lemra nai mapa kar nung tamakok ajurutsü.



Taurus
20/4-20/5

Tanü nai nisung shiba atema koma nokdaker, ibaji metetang. Nü dang jenjang temaba nung alirtem den kasa toktepra na lendongi aitsü.



Gemini
21/5-20/6

Na lokti nisung süra tanü nai ken o kümdanga jembishinüang. Mangatettep adokdaksüba ken o tem nai mejembitsüla.



Cancer
21/6-22/7

Nai jembizüka yokba o tem nai tanaben meyiba magitettsü. Anungji kinunger tsüngda mangatettep madoktsüsa kümdanga jembishinüang.



Leo
23/7-22/8

Nü sasa nü tenüng amshitsü temerang mesüra nü tenüng jenjang temabai ajungkettsü temerang. Tangar den rarapangsen madoktsüsa liang.



Virgo
23/8-22/9

Nai tarutsü asoshi kanga bilemer aser aiben o tali mejembir. Tanü nai nüngdakba mapang iba yimya amshiang aser tangar-ia na nükshitsü.



Libra
23/9-22/10

Tanü nai bilemba ji dang shidak ta nai mebilemtsüla. Aser nai tangar indang khuret lemsatepdang tekong temerang.



Scorpio
23/10-21/11

Nai anguba ajunga na dang agitsü merangra na aiben lendongi aitsü. Tanü nai nüngdak makaba nung nü tejangrabatem lemsateptsü südi.



Sagittarius
22/11-21/12

Tanü nai tangar tsüngda yimjung yanglutsür ka ama alitsü merangang. Aser nai ajangshia aliba yimyatem amshiang.



Capricorn
22/12-19/1

Na tanü nü mapa nung dang temolung agüjang. Saka nü mapa nung tangar teyari merangra na amajok nung mapang indoker asütsü.



Aquarius
20/1-18/2


Medemer tsüngda o tajung jembitsü merangang. Mesüra tanü nai mekemdangra nisung kar den mangatettep adoktsü südi.



Pisces
19/2-20/3

Nai tanü nü mapa nung dang temolung agüjang. Nai nü molung kera melenshitsü tebilem asür nü mapa tembanga inyaktsü merangang.

8buba Jagran Film Festival Rishi Kapoor-i lapoktsütsü



New Delhi, June 21 (Agencies): Tejen actor Rishi Kapoor-i July 1 nü Delhi nung 8 buba Jagran Film Festival lapoktsütsü.

Iba film festival ya New Delhi nung tenzüksü aser iba sülen India nung tongtibang yimti 16 tashi nung agiyonga aotsü. Yimtittem rognung Kanpur, Lucknow, Allahabad, Varanasi, Patna, Bhopal, Ranchi, Indore, Ludhiana aser Dehradun densema lir aser iba benjungmong tatembangbuba sentong September ita award ceremony agia Mumbai nung

tembangtsü.

Sentong ayongertemi ashiba agi, nungtugü actor yagi benjungmong mapang yimti karnungbo sensaksemba sentong kar nung dena shilem agitsü.

Delhi nung iba sentong Siri Fort Auditorium nung akatsü aser benjungmong mapang yimti ajak nung Rishi Kapoor-i taoba mapangtem nung shilem agiba film tem pa nem tetushi agüja lephsia sayuba sentong ka akatsü.

Rishi Kapoor-i shilem agiba nüngtugu film tem rongnungi

Mera Naam Joker, Bobby, Amar Akbar Anthony, Agneepath aser Do Dooni Chaar film tem iba benjungmong nung sayutsü.

"Rishi Kapoor-i iba film benjungmong nung shilem agitsü asoshi molungba atema kanga tushia bilemer aser matateti bilemer," ta iba sentong nung actor-i shilem agitsüba indang jembidang Senior Vice President Basant Rathore-i ashi.

Iba film festival nung alima ajunga nungi film 130 dak tema screen asütsü.

Wonder Woman nungi Gal Gadot sen aika aazüktsü

June 21, 2017 (Agencies): Wonder Woman movie takok anguba ajanga Gal Gadot sen tali aika aazüktsü aser iba movie sayar tang tashi nung alima ajunga nungi sen bendenba ajak agi million \$573 lir.

Arishi küm 32 tain, Gadot-i iba movie nung Diana Prince ama shilem agir aser iba film tangoktsü atema Warner Bros ajanga la nem taa sen \$300,000 agüja liasü, saka iba movie takok ngua aoba ajanga la nem sen talila agütsüsemtsü.

Iba movie sayar hopta ka jungogo aser tang tashi nung sen million \$573 aazüka lir, ta osang ka ajanga ashi.

Wonder Woman movie nung

Gadot ya Chris Pine aser Robin Wright nunger den külemi shilem agir aser lai iba movie yanglu metenzükdang zülutepa aliba taa dang anaben agi tali angutsü, ta kasa osang ajanga ashi.

DC Extended Universe movie tem nung lai shilem agiba movie shia nung la nem taa sen \$300,000 agütsütsü renema lir aser item movie ya 'Wonder Woman', 'Batman v Superman: Dawn of Justice' aser ano yanglutsü aliba 'Justice League' amala lir.

Saka la indang movie kanga nüngtugu akümba ajanga la indang taa ya timba kümdaktsütsü asoshi movie yanglurtem den jembitsü lir.

Gal Gadot ya iba film industry nung shilem agitsü metenzükdang mitkar ka liasü aser Miss Israel liasü.

"Ni Wonder Woman shilem agitsü aso amai bilemer. Superman, Batman mesüra Spider-Man ama teburtem atema shilem agitsü teperi lir. Saka tetsürtem atema bo teti chuba'er jala kümzükba otsü dang lir," ta jala arishi küm pongu tain, Alma aser jala ita asem tain, Maya tetsü, Gadot-i ashi.

"Tang bo asenok atema Wonder Woman lir - la tasü tait, tekümdang, lai la dak temolung alemer aser lai ajak inyaktettsü amai amanger. Aser ibaji ni asoshi tetsür chichiba lir," ta lai ashi.




Mumbai, June 21 : Bollywood actors Anil Kapoor, Arjun Kapoor, Athiya Shetty, Ileana D'Cruz aser director Anees Bazmee nunger Mumbai nung 'Mubarakan' film sayaba mapang tangokba noksa nung angur.

TAN HOPTA ATEMA - KOMA SÜLA ?

Q. Nagaland government nung ochimashi inyakba mapatem ajunga ya CBI nem bushisüngdaksütsü asoshi temelaba agütsü nunga koma süla ?

Olong 20 shi nung June 23, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.

TCS ajanga Andhra University ya Digital University-i melentsütsü



June 21, 2017 (Agencies): Tata Consultancy Services (TCS)-i yaria Andhra University School of Distance Education (AUSDE) ya digital university kümtsütsü.

TCS aser Andhra Pradesh nung aliba university tsüingda iba sentong asoshi tezüngzüktepba ka agiogo aser iba sentong tasenba ajanga iba university nung züingnürtem asoshi sabang tuluba lapoktsütsü, ta iba company ajanga Mongolbarnü sangdong.

Iba tezüngzüktep nung aliba ama AUSDE ajanga TCS iON sabang amshia kaketshir atema admission agiba, academic course content agütsüba, tatidang ketdangsüba aser tanga university nung ama

ketdangsüba nung yaritsü.

AUSDE online ya online akümba sülen kaketshirtemi course balala shimba, fee agütsüba, tatidang agütsütsü asoshi hall ticket aser tatidang result tem online ajanga inyaktetsü, ta TCS ajanga ashi.

TCS iNO Platform ajanga university inyakyim ajanga digital kümdaktsütsü. Iba den külemi university indang kiojen, angazükba, tesayuba aser campus ajanga nung technology balala amshitsü.

AUSDE ajanga certificate, diploma, undergraduate, post-graduate aser professional course nung tang kaketshir 60,000 dak tali nem agütsür aser iba university ya digital

akümba sülen shisatsü agütsüba nung jenjang tajungba kümdaktsütsü, ta AUSDE ajanga ashi.

"TCS iON Platform amshia AUSDE ya digital akümba sülen iba university nung sendaktepa aliba kija aser lokti ajanga maparen ajak tezübaba aser temolung lemteta jenjang temaba nung tamakok malui inyaktetsü, ta TCS iON Global Head, V. Ramaswamy-i ashi.

"TCS den tezüngzüktep agia Digital India sentong nung shilem ka akümba asoshi kanga pelar. Iba sentong tasenba ajanga 'regular' aser 'distance' education agütsüba inyakyim tuluba akümtsü nükjiding lir," ta Andhra University indang Vice-Chancellor, G. Nageswara Rao-i ashi.

Hyderabad City Wi-Fi Project kübok Hotspots 1,000 amenokogo

June 21, 2017 (Agencies): Telangana sorkari telecom service provider tem den longjemer Hyderabad City Wi-Fi Project amenokogo. Iba project dang ya 'Hy-Fi' taa ajar aser iba ajanga minute 30 atema bandwidth 5-10 Mbps nung nüburtem nem Wi-Fi angati agütsütsü.

Principal Secretary, Information Technology, Jayesh Ranjan-i osangbenertem dang ashiba agi, ano ita ana tsüingda nung hotspot 2,000 amenoktsü aser iba ajanga business inyaktertem, shopkeeper, entrepreneurs, kaketshirtem, tetsürtem, aser raliwalirtem ajangzütsü.

Iba project nung sen crore 300 shi indokogo aser iba nung service operators aser infrastructure agütsürtem rongnung Airtel, ACT Fibernet, aser BSNL nunger den longjemer inyaker.

Telecom services

internet company tem indang lokti tematiba, Cellular Operators Association of India iba project nung state sorkar technical adviser lir.

Iba project ya 'Digital Telangana' sentong kübok 2015 küm tenzüka liasü aser iba mapang nung mall, tourist spot, public office, police station, government school aser college tem nung wi-fi hotspots 100 shi amenoka liasü.

Taoba küm ana tsüingda nung iba project yagi tesem 250 shi nung amenoka liasü aser sorkari tang iba project kübok yimti ajanga nung tesem 3000 dak tali nung hotspot amenoktsü asoshi lemtetogo. Parnoki maneni Internet Service Providers (ISPs) tem dang iba maparen takok ngua aotsü atema tetuyuba ka agütsüogo.

Greater Hyderabad Mayor Bonthu Rammohan, shibai iba sentong lapokja liasü pai ashiba agi, 'Hy-Fi' sentong ya

tatashitsü ka akümtsü aser iba ajanga Hyderabad yimti digital tsütsü tali sendaktepa akümtsü.

COAI Director General Rajan S. Mathews-i ashiba agi, Hy-Fi project takok ngua amenokba ajanga Hyderabad aser Telangana na linük asoshi tatishitsü ka akümtsü. Project partner tem rongnung Indus Towers-i 'infrastructure' agütsütsü aser service provider, Act Fibernet, Airtel, aser BSNL nungeri 'connectivity' agütsütsü.

Bengaluru nung amenoker aliba 'Atria Convergence Technologies'-i tatembang buba mile tazüing aliba süngtsütsü asoshi aniokogo.

"Digital economy tsütsü nüburtem renloka aoba mapang ka nung Telangana sorkar den onok longjemer inyakra ajanga Hyderabad nung internet connectivity tali tajungba akümtsü," ta Fibernet, CEOA-AACT, Bala Malladi-i ashi.



FBF Femina Miss India 2017 tetoktepba nung Nabam Akaa-i design asüba süoshi Best National Costume ngutetogo.

FBF Femina Miss India 2017 National Costume competition yasüing Mumbai nung kaogo. "Best National Costume" akokla ya tangar masü saka Northeast nungi Arunachal Pradesh tenüing nung shilem agir Licha Thosum lir. Licha Thosum atema National Costume ya Arunachal Pradesh nungi designer Nabam Akaa-i design asü. FBF Femina Miss India 2017 final June 25 nü akatsü. Noksa nung Akaa-i design asüba süoshi Licha Thosum-i semer ngur.

ISRO-i Satellites 31 yoktsü

June 21, 2017 (Agencies): Hokolbarnü India-i Earth observation satellite Cartosat-2 series aser co-passenger satellites 30 (29 bendanger indang aser 1 India nunger indang) rocket Polar Satellite Launch Vehicle (PSLV) ajanga yoktsü. Cartosat-2 ya kg 712 lir, ta Mongolbarnü Indian space agency ajanga metetdaktsü.

Indian Space Research Organisation (ISRO) ajanga ashiba agi, PSLV rocket's XL variant ya hokolbar anepdang 9:29 ako nung Sriharikota rocket port nungi yoktsü. Satellite 30 ya senteper seret 243 asütsü aser Cartosat dena satellite 31 prongla senteperbo seret 955 asütsü, ta ISRO-isa

metetdaktsü.

Iba rocket ajanga satellite tem 505 km polar sun synchronous orbit (SSO)-i kakettsütsü.

Co-passenger satellites tem rongnung linük 14 nungi nano satellites 29 dena lir. Linüktem rongnung Austria, Belgium, Britain, Chile, Czech Republic, Finland, France, Germany, Italy, Japan, Latvia, Lithuania, Slovakia, US aser India nunger nano satellite ka densema lir.

International customer nano-satellites 29 yokba ya ISRO's commercial arm, Antrix Corporation Ltd aser international customers tsüingda commercial arrangement nung shilem ka lir.

Sen 19,999 jenjang Gionee A1 Virat Kohli signature edition sayaogo



June 20, 2017 (Agencies): India nunger cricket asayar nüingtu, Virat Kohli indang Signature Edition Gionee A1 smartphone Amazon nung angutsü, ta Gionee ajanga sangdongogo. Iba Gionee smartphone tasenba indang tesülen cover nung Gionee Brand Ambassador, Virat Kohli signature lir.

Iba phone ya Amazone nung June 27, anüingdang 12:00 ako nungi tenzüka sen 19,999 agi angutsü aser company website ajanga tanü nungi tenzüka jelia meka-a yutettsü. Jelia meka-a ayuba ajanga customer nem Sennheiser indang headphone den ano oset kar angati agütsütsü.

Gionee ajanga iba company indang brand ambassador atema Shruti Hasan, Diljit

Dosanjh, Dulquer Salmaan aser Prabhas nungera shimogo.

Iba smartphone indang battery tashi ya 4010mAh lir. Gionee A1 tejaklen camera ya 16-megapixel, fixed focus, f/2.0 aperture, 1/3.06-inch sensor, 5P lens aser selfie flash keta lir. Dual-SIM amshitetba Gionee A1 smartphone nung Amigo 4.0 dak ajemdaker Android 7.0 Nougat lir. Iba phone indang display ya 5.5-inch full-HD (1080 x 1920 pixels aser MediaTek Helio P10 (MT6755) SoC inoka lir.

Gionee A1 phone tesülen camera ya 13-megapixel den 1/3.06-inch Sony IMX258 sensor aser dual-LED flash keta lir. Iba smartphone ya India nung March ita sayar liasü.

Happy Birthday

TENÜNG	- SENTINA
Tasoba	- 22/06
Küm	- 2
Yim	- Mongsenyimti
Talidak	- Veterinary Colony, Burma camp, Dimapur.

Tsüingrem Tulusangi temeim jala arishi küm ana buba ozüi aginüba ama anema aniba asoshi Pa Tenüing asanger. Ano maneni la nem anema aliba aser arishi maojang ta temoatsü jazüktsü.

- Temeim tsüraburtem aser oya Menmen.



Moscow, June 20, 2017: Mongolbarnü Russia yimtiba, Moscow nung Department of Science & Technology Secretary, Prof. Ashutosh Sharma aser Russian Science Foundation (RSF) Director General, Dr. Alexander Vitalievich Khulnov nati tezüngzüktep ka agiba noksa nung angur.

Sorkar indang TB control scheme atema Aadhaar nungdaksü

New Delhi, June 21 (Agencies): Bodhbarnü Union Health Ministry-i sangdong ka ajanga tuberculosis (tb) tashidak agi shirangertem dang, Central sorkar scheme kübok tajangzük balala agitsü atema Aadhaar number agüjang, ta metetdaksü.

Ministry-i Aadhaar card malirtem dang August 31, 2017 tashi nungbo Aadhaar enrolment agitsü metetdaksü.

Union Health Ministry sangdong nungsa, "Iba scheme (Revised National Tuberculosis Control Programme- RNTCP) kübok teyari agitsü temsüa alirtemi Aadhaar number agütsüsüla," ta metetdaksü.

Aadhaar number malirtem atema health ministry-i Aadhaar enrolment facilities agütsüsü. Ano pei aliba jila

mesüra block nung Aadhaar enrolment centre melira state sorkar department-i UIDAI den yaritepa tesemesem nung enrollment facilities agütsüsü.

Kasa sangdong nungsa, iba scheme kübok teyari balala den senotsü teyari densema lir, ta metetdaksü.

Tb agi shiranger ka Aadhaar number menguaka Aadhaar enrolment ID slip, Aadhaar enrolment centre mesüra voter ID, PAN card, bank passbook, ration card ama sorkar kulikaket lira iba scheme kübok teyari agia litettsü, ta sangdong nungsa metetdaksü.

"Assam, Meghalaya aser Jammu & Kashmir dak alaka iba osang sangdongba anogo nungi tenzuka states aser Union territory ajak nung iba ya mapa küma inyaksü," ta

ministry-isa ashi.

National Health Mission kübok Revised National Tuberculosis Control Programme (RNTCP) nükjindong ya tb tashidak tekaratiba nung puteta anepalutsüsü atema lir.

Tawa World Health Organization (WHO)-i, tamalen asadangtetba dang nungi India nung tb tashidak ya kanga tamajungba lir; 2015 küm iba tashidak tasen putetba shilem 60 aliba linük trok rongnung India densema lir, ta ashi.

Osang ajanga ashiba agi, 2015 küm India nung nütsüng lakh 1 shia nung nisung 217 bo tb tashidak keta lir.

India sorkari 2025 küm tashi nungbo linük nung iba tashidak meshimeshia samatsüsü sentong lir.

WB sorkari ayongba senden nung Party temi madentsü bangjem

New Delhi, June 21 (Agencies): Bodhbarnü tashi nunga Darjeeling nung Internet services melapoktsü, aser GJM-i maneni mapang telatet ka makai mokdanga lir.

Pharmacy dak alaka dokan, hotel aser restaurants ajak shibanga liasü.

Mongolbarnü Gorkha Janmukti Morcha (GJM)-i ayonyba party ajak senden nung, security sepaitem magien tashi maneni

mokdangtsü bangjema liasü. Tanüa Morcha züngsemtemi tenemlen aliba district tesem balala aika nung state jenjang meshia longkak aitogo.

Tanü agi anogo pezünübuba Internet services shibangtsüba aija GJM aser tanga party temi, sorkari nüburttem osangtsüsang lemsatepba temeten agiener, ta aitsü.

State tensa indang lemteptsü atema West Bengal


sorkari June 22, 2017 party ajak senden ka ayongzuka lir, ajisüaka hills districts nung part tem den Congress aser Left party-i iba senden nung shilem magitsü lemtetogo.

"Chief Minister, Mamata Banerjee tang state nung mali, anungji iba senden ayongbaji tetezü mali," ta parnoki ashi.

Tanü Morcha pusemertemi Banga Bhawan, New Delhi aser Darjeeling naprongla nung longkak aita liasü.

Justice C S Karnan Kolkata Presidency Jail nung puokogo

Kolkata, June 21 (Agencies): Court mezüngmeshiba ken o nung yashi Retired Kolkata High Court judge, Justice C.S. Karnan pua liasü aser Bodhbarnü Supreme Court (SC)-i pa nem interim bail magütsüba sülen pa Kolkata nung aliba Presidency Jail nung puokogo.



Justice Karnan (File)

Justice D. Y. Chandrachud aser Justice Sanjay Kishan Kaul nati akumba vacation bench-i, Justice Karnan nem tamalen ita trok tepoukdak ayutsü obendang agüja aliba agientsü memelung.

Karnan atema okatsür, Mathew J Nedumpara-i vacation court nem iba temepishibaji agütsü saka bench-i magizük.

Nedumpara-i SC dang, bail meshiba den külemi ita trok tepoukdak ayutsü obendang agüja alibaji agientsü mepishi, ajisüaka court-i, "Obendanger teneti akumba bench-i iba obendangji agütsüogo. Iabajagi ajak alener, iba jagi asenoka

alener," ta ashi.

Yashi Coimbatore, Tamil Nadu nung Kolkata police-i Justice Karnan pua liasü.

May 19 nü Karnan-i SC dang ita trok tepoukdaki aitsü obendangji agientsü mepishia liasü saka court-i magizük.

Karnan-i Madras High Court aser SC obendangertem anema shidi aika zülua liasü, iba sülen February 8 nü pa dang nungi administrative aser judicial tashitem agien.

India nunger judiciary putiotsü nung tang mezüng high court nung teinyakdak obendanger ka tepoukdak ayutsü obendang agütsübaaji ibai lir.



June 21, 2017 nü Palakkad, Kerala nung MoS for Commerce & Industry (Independent Charge), Nirmala Sitharaman-i 3buba International Day of Yoga sentong nung jembiba angur.

JD(U)-i NDA Tir candidate Ram Nath Kovind pusemstsü

Patna, June 21 (Agencies): Opposition party tem atema osang tamajung kaji, Janata Dal (United)-i NDA Tir candidate, Ram Nath Kovind pusemstsü lemtetogo.

Bodhbarnü JD(U) senden ka mena liasü, aser iba senden nung parnoki BJP-i aniba NDA Tir candidate pusemstsü lemtet.

Sonbarsha constituency nungi MLA, Sada-i, "Party-i Kovind pusemstsü lemtetogo. MLA tem senden nung iba telemtetba agi," ta metetdaksü.

Yashi Bihar Chief Minister, Nitish Kumar-i NDA Tir atema Kovind candidate shimba asoshi

pelaba lemsatepba sülen tanü state sokar tashi nung aliba party-i pa pusemstsü lemtetogo.

Kovind ya Bihar Angh teinyakdak liasü.

Yashi Shiv Sena-i NDA Tir candidate pusemstsü lemteta liasü.

Ano külen Left party temi ajungshiba nung ajemdaker Congress-i aniba opposition party temi NDA candidate Kovind den toktepdaksütsü asoshi candidate shimtsü.

June 22, 2017 nü opposition front senden amendang Kovind anema tokteptsü atema telemtetba agitsü, ta CPI national secretary D Raja-i metetdaksü.

Kashmir nung Hizbul telungpur ana khaset

Srinagar, June 21 (Agencies): Tanü Kashmir, Baramulla district nung security sepaitemi Hizbul Mujahideen telungpur ana khaset, ta police-i metetdaksü.

Telungpur anaji Indergam Pattan nung alir, Basit Ahmad Mir aser Brat Sopore nung alir Gulzar Ahmad na lir ta jangjaogo, ta parnokisa ashi.

Iba tesem nungji telungpur aliba osang lazükba sülen sepaitemi yasüng iba tesem longbang aser tanep telok ana tsüngda khatepdang telungpur anaji khaset, ta police ketdangser kati ashi.

Iba tesem nungjagi AK rifle ana, AK magazine 5, AK injang 124, grenade ka aser yangkhu ka angu, ta paisa shisem.



New Delhi, June 21, 2017: Bodhbarnü New Delhi nung Delhi Police temi 3buba International Day of Yoga - 2017 sentong nung shilem agiba noksa nung angur. Kasa noksa nungsa Commissioner of Police, Delhi, Amulya Kumar Patnaik-a angur.

England chubatsür-i 'Queen's Speech' agütsüogo China nung azü shi achiba benjung tenzükogo



London, June 21 : Bodhbarnü central London, Britain nung Parliament senden tenzükba anogo nung Britain Chubatsür, Elizabeth aser Prince Charles na Royal Gallery ajanga aruba noksa angur.

London, June 21 (Agencies): Tanü England chubatsür, Queen Elezabeth II-i "Queen's Speech" agütsüba nung Britain-i European Union doktsütsü asoshi yangluba sentong aser temzüng balala metetdaksü.

Britain nung mapang matongdang election agishiba nung Ato Kelonser, Theresa May teloki taoba mapang dang nungi menden tajemba nugtet, saka lai aniba teloki Britain nung sorkar kemtettsü asoshi mapang talangka atsütepba sülen tanü Britain chubatsür-i bill 27 metetdaksüogo. Aser item rongnung bill 8 bo Brexit den sendaktepa lir.

European Union (EU) temzüng tem United Kingdom (UK) indang ozüing akümtsüba, shishilembaba nung sentong tasen, immigration, ango metsüba aser shishilembaba, nuclear lendong nungi kümzüka alitsüba, aluyimba aser sanction amala indang bill densema Queen Elizabeth II-i tanü metetdaksüogo.

Conservative teloki Britain election nung majority mongutetba ajanga sendong aika iba bill nungi agien.

Theresa May indang sorkar yaritsü asoshi Democratic Unionist den maneni jembiba mapang lir aser 'Queen Speech' ajanga taruba hopta House of

Common nung vote agiteptsü aliba nung temolunglemtsü ka agütsür, ta Downing Street odongtar kati ashi.

Tanü England chubatsür-i metetdaksüba bill tem ya sorkar jungjunga kümteba sülen House of Common nung jebitsü aser iba sülen mapa kümä inyakyonga aotsü.

Taruba küm ana inyakyonga aotsü asoshi sentongtem Queen Elizabeth II-i metetdaksütsü aruba mapang la ya Prince of Wales-i meina aru, aser la kinüingbo, Duke of Edinburgh ya temang majungba ajanga Mongulbar aonung mozü-i anir oa lir.

Indonesia nung Facebook domestic unit ka amenoktsü

June 21, 2017 (Agencies): Social networking company Facebook Inc, Indonesia nung domestic unit amenoktsü asoshi sorkar nungi temelaba nguogo aser sorkari iba maparen inyak tenzükogo, ta linük nung investment chief-i Bodhbarnü ashi.

Indonesia nungeri multinational technology firm tem par linük nung amenokdaksütsü asoshi inyaka arudar, ajisüaka parnoki Alphabet Inc indang

Google company amalai "auxiliary" services agütsü asoshi shishilembadak tilala lapoker alimelen saru terara dang agütsüa inyaka aru, saka parnok linük nung tanga lenmang nungi sen aika aayanga liasü, ta nemjema ashi.

Facebook ya tang Indonesia nung central Jakarta nung office amenoker iba tesem nungi company maparen balala achaayanga inyakdar. "Ni Facebook-i mapa junga inyaktsü

jangraba rebrangetogo. Onoki saru balala atema bilemer," ta chairman of Indonesia's investment coordinating board, Thomas Lembong-i ashi.

Investment board aser communications ministry ajanga tawa Facebook-i amenoktsü aliba shishilembaba yimya nung shishilembartem bushidar, ta Lembong-isa ashi.

Iba dak sendakba nung Facebook-i tang tashi nung kecha telangzüba agüja mali.



North Cotabato, June 21, 2017: Bodhbarnü Pigcawayan, North Cotabato, Philippines nung Islamic kiralongrartemi primary school ka agiba sülen sepaitem den khatap, ajisüaka tesülen kiralongrartem jagi civilian kar puer jena ao. Item tatalokba sülen iba tesem nung alirtemi pei ki toktsür ajentsü atema gari atatepba noksa nung angur.

Yulin, June 21 (Agencies): China linük nung aliba Yulin yimti nung kanga mangatettep aketba benjungmong, azü shi achiba benjung tenzükogo. Iba benjung ya shibangtsüogo, ta olulu angashiba mapang ka nung tenzükogo.

'Lychee' aser 'Dog Meat' benjung ya küm shia Guangxi province nung amonger.

Shishilembadak tesem nung azü shi mayoktsü asoshi sorkar ajanga ozüing agütsüogo, ta iba benjung anema nokdaker telok kati 2017 küm tetenzüklen shia liasü.

Saka item shishilembar temi iba amala tenokdangba ozüing kicha mangashi, ta osangbener dang ashi. Iba benjung nokdanga mali, ta yimti nung ketdangsertemi May 15 nung metetdakja liasü.

Yulin yimti nung shishilembadak tesem tulutiba, Dongkou market nung Bodhbarnü azü shi ayokba nguogo, ta osang ajanga ashi. Iba tesem nung ya police aika liaka azü shi ayoker, ta kasa osang ajanga ashi.

Iba benjung anema nokdaker ka police temi Dashichang market-i aotsü nokdang aser iba shishilembaba tesem nung azü taküm ayoker südi, ta lai


osangbener dang ashi. Taoba küm iba ama benjung mapang azü shi ayoker aser azü tepsetba anema nokdaker tsüingta mangatettep adoka liasü.

Yulin yimti ya Guangxi province nung azü shi achiba tesem tulutiba masü saka iba tesem nung iba benjungmong küm 10 tejaklen tenzükba sülen linük aser alima ajungai meteta aküm.

Iba tesem nung aliba nüburtem aser azü shi ayoker temi ashiba ajanga, parnoki azü ya ak, nashi aser ain ama dang tepseta ayoker.

Azü shi achiba yimya ya China, South Korea aser Asia nung linük kar nung akhi mapang nungi amshia arur. Akhi tetsü-tebu yimsü nung bendanger-i teka aier, ta iba benjung sabar temi aitsür. Tsükla mapang azü shi achiba ajanga teyari agütsür, ta China nunger soba-liba ajanga ashir. Aser iba shiruru ya tangar dang nungi auya-a bener arua reshikangshia metepsetra tai mali, ta azü shi machir temia ashir.

Iba benjung ya anogo 10 amonger aser taoba küm iba benjungmong mapang azü 10,000 dak tali tepseta achi, ta osang ajanga ashi.



Kecskemet, June 21, 2017 : 2015 küm Austria nung aliba apu ka nung truck gari ka telung nung bendanger nisung 71 'suffocate' süa südaktsüba ken o nung tai tonglokja alir rongnung nisung ka Bodhbarnü Kecskemet, Hungary nung aliba court kati anir aruba noksa nung angur.

Belgium nung kiralongra mapa inyaktsü merang, tamakok alu

Brussel, June 21 sangdong.

(Agencies): Mongulbarnü Brussel nung aliba train station ka nung kiralongra mapa inyaktsü merangba tamakok alu. Arishi küm 36 tain, O.Z-i "Allahu Akbar" ta ayimtena Brussels Central station anasa train nung aotsü atateba aliba tesem ka nung 'nail bomb' pokdaksütsü merang saka iba bomb tashi agi mapok.

Iba nisung ya immigrants tem aliba Molenbeek tesem nungi lir, ta police temi jangjaogo.

Iba lendong ya Islamic State teloki agütsü, ta parnok sasa

Osang ajanga ashiba agi, iba nisung ya train station telungi ait aser nisung 10 dak tali sentepa aliba tesem nung pai bena aliba suitcase telung nung aliba bomb pokdaksütsü merang, saka iba suitcase nung mi jangru tenzük. Iba sülen pai iba suitcase doktsür tesem balakai jena ao aser tanaben iba suitcase apok, saka nisung kata meyirur aser masü.

Maneni pai mitkar aliba tsütsü-i ayimdena aoba mapang mitkartepi pa khaset, ta kasa osang ajanga ashi.

BJP nung adenba atema Muslim nung kibong 25 anema inyak

Agartala, June 21 (Agencies): Tawa South Tripura kübok Shantirbazar sub-division nung Muslim nung kibong kar BJP nung adenba atema 'mosque' kati maitdaksüba asoshi CPI-M pur aitsüogo.

District ketdangsertemi ashiba agi, parnokia iba osang angazükogo saka tang tashi nung item kibongtemi kecha osang tejangja agüja mali.

"Nisung kari danga tamangba yimsüren nung temeten agüja aliba tsütsü kar nem danga meinprong agütsüra, ketdangsertemi nüburtem temetentem kümzüka ayutsü asoshi tapet inyaktsü," ta South

Tripura, District Magistrate, C K Jamatia-i ashi.

BJP Minority Morcha tir, Md Jasimuddin-i ashiba agi, CPI-M züngsemtemi parnok amokmerenba osang tejangja Superintendent of Police (South) nem agütsüogo. Paisa ashiba agi, CPI-M züngsemtemi kanga nokdanga, taoba ita Shantirbazar kübok Madhyatilla nung alir kibong 25 nungi parnok 200 shi CPI-M doktsür BJP nung aden

"Item kibongtem lokti nungi sentok aser sorkari teyari agütsüba kecha magütsütsü ta amokmeren. Iba sülen parnok BJP nung adenba mapang nungi tenzüka MGNREGS mapatem

aser sorkar nungi teyari arubatem magütsü. Hopta ka tejakdang CPI-M party puri Muslim nung tamangba yimsü nung lenirtem ajungmesoa item kibongtem nokdang," ta Jasimuddin-i ashi.

Parnok BJP nung adenba ajanga putiri parnok nem ozüing agütsüba mezüingbo parnoki anem. BJP ya Hindu pusemba party ka lir aser parnoki Islam tenüing agi, Babul Hossain-i ashi.

BJP nungi teshimtet telok kati district SP ajurua pa dang item kibongtem nem security agüjang aser parnok tekülem kidang otettsü atema inyaktsüla, ta takhangba agütsüogo.

PWD-i Nagaland nung...

(TAPAK 1 NUNGI)

Nagaland nung gari lenmang anepalutsü atema senotsü peria melemzüktsür aser Work Charged employees ta ser alirtem anepaluba nung teyari angutsü, ta paisa shisem.

PWD R&B Minister, Swu-isa department nung engineer tem dang detailed project report (DPRs) yangludang kanga kümdangtsü atema ayongzük.

Mapang shitak nung gari lenmang anepalutsü atema PWD R&B ket nung osettsüset peria alitsüla aser iba atema taküm August ita tashi nung R&B divisions 24 nem excavator ka ka agütsütsü, ta paisa shisem.

Sentong nung PWD Engineer-in-Chief, Khupi Natso-ia o jembidang, Nagaland nung gari lenmang majungbaji contractor temi mapa shitak meinyakba ajanga dang masü saka 'materials' tajung mamshiba ajanga lir, ta metetdaksü.

"Asen state nung gari lenmang shilem 70 shi ka nung lung shitak agüja mali aser materials majung" ta Natso-isa shisem.

Iba sentong nung Tenaci Engineering Pvt. Ltd, Alom Poly Extrusion Ltd aser Stabilig Road Solutions, Aegis International Group nung mongin nisungtemi Nagaland PWD kübok division ajak nungi engineer tem nem tesayuba agütsü.

North East nung tzünglu ajanga anentsüh tali buludar

Guwahati/Agartala/Itanagar, June 21 (Agencies): Northeast, India nung tzünglu maneni aruba ajanga tesem aika nung tzümetsünger aser anentsüh aludar, aser ibaji ajanga tesüiba ghonda 24 nunga

nisung asem süogo, ta osang ka ajanga metetdaksü.

Talisa Assam kübok Darrang, Karimganj, Lakhimpur aser Sonitpur district tem nugbo tzümetsüing tensa mejungi lir.

Assam State Disaster

Management Authority-i ashiba agi, tawa tzümetsüing ajanga nisung 52,260 kongshiogo, iba den külemi tzülü hectare 3,000 dak tema nung tzü metsünga lir, apu aser gari lenmanga aika raksatsüogo.

Temeim oba,

Tanü ya onok asoshi kanga tongtibang anogo ka lir aser iba anogo nung onok ajaki nü nem "Happy Birthday" salem agütsür. Kibubai ano maneni onok mechi nü nem taochi aser tesünep agüjang aser ano küm aika jangratema alitsüsa arishi moajangma.

- Temeim jabaso aser jalatem.



GOVERNMENT OF NAG-ALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND : KOHIMA

NO.DET-12/37/16 Dated Kohima, the 21st June 2017

ADVERTISEMENT CORRIGENDUM

NO.DET-12/37/16: In partial modification to Advertisement NO.DET-12/37/16 dated 17-06-2017, the date of interview for the walk-in interview for engagement of Aspiration Mapping Officer's (AMO) to conduct the Aspiration Mapping Study for the district of Mokokchung been rescheduled as 04-07-2017.

Sl.No	Name of the Post	Name of the District	Name of Blocks	No. of Post	Name for Interview	Date of Interview
1	Aspiration Mapping Officer's (AMO)	Mokokchung	Chuchuyimang	1	District Employment Exchange, Mokokchung	04-07-2017
			Changlongga	1		
			Tuli	1		
			Mangsomta	1		
			Naunglong	1		
			Kabong	1		
			Longham	3		
Dngsanglong(N)	1					
Dngsanglong(S)						

All the other terms and conditions remain the same.

Sd/-
(MUTHINGNYUBA SANGTAM)
 Director
 Employment, Skill Development & Entrepreneurship
 Nagaland, Kohima.

Issued by: DIPR

OFFICE OF THE
MONGSENYIMTI LONGKUMTSUR TELONGJEM
 MOKOKCHUNG
NAKLUR

Kr.Dr.Watinaro Longkümer (Wb. I.Süngit Lkr aser Wt.Sosangbenla Ozüküm na jala) Psychology nung, Christ University Bengaluru nungi "DEVELOPMENT AND STANDARDIZATION OF TOOL TO MEASURE DIRECTION,MOTIVE AND AFFECT OF SOCIAL COMPARISON AMONG ADOLESCENTS " topic nung Doctorate nguteta takok tulu anguba asoshi Mongsenyimti Longkümsür Telongjemi konang tetushi tulu agüja la NAKLUR.

Iba den külemi lokti tentet aser shisaliok rogo sabang balala nung la ajanga shisa tajung jenti agüja mapa tulu inyaker. Item ajak asoshi asen lartemi nü nem akhüm tetushi tulu agüja na naklur.Teyanglur Tsüngremi maneni nü sempettem renlokja aniangma ta sarasademtsür.

Sd/- **I.Atila.Lkr** President, M.L.T.M
 Sd/- **L. Amenla.Lkr** Secretary, M.L.T.M

KOHIMA LAW COLLEGE
 RAJ BHAVAN ROAD, KOHIMA.
LL.B ADMISSION OPEN 2017

For more information and other queries contact Kohima Law College during office hours (10:00 AM - 2:00 PM)
 Phone : 9615608958, 9856881691

F.No. NEC/IPR/485/Advts/2016
Government of India
Ministry of Development of North Eastern Region
North Eastern Council Secretariat
Nongrim Hills, Shillong-793003 (Meghalaya)

Expression of Interest for Empanelment meshir

DAVP nung züngsema aliba Creative Agencies-i DAVP jenjang nung NEC atema advertisements / publicity mesüra promotional materials / journals / bulletins / invitations / brochures etc. atema Creatives / Dummies / Prototypes design asütsü atema Expression of Interest meshir. Agency ji tesüiba küm 5 mesüra talila iba mapa inyaka arurtem asütsüla.

NEC website <http://necouncil.gov.in> nungi nüngdakba kulikakettem aser temetettsütem download asütsü akok aser July 5, 2017 matongdang Director (Information & PR), North Eastern Council, Shillong nem agütsütsüla.

davp 11104/11/0007/1718



Tzüdikong, June 21, 2017: National Highway Way 61 Tuli aser Tzüdikong na tsüingda lenmang tezü nung küm ishika tejaklen nungi Tuli area nung bendenba anak rüja ajak iba tesem nung ya intoka arur, saka tangbo Mariani nungi Mkg-i atuba lenmang majungba agi yaküm küm nungi tenzüka Amguri nungi Mkg iba lenmang nung senzür, tangbo iba tesem nung ya Tuli area nung bendenba anak rüja tu dang masü, saka Mkg-i oset bener atuba LP Trucktem meyipa talui iba tesem nung Mkg town aokba rüja ajak bener alua indokba noksa nung angur.

Tzüdikong nung alirtembo Milak tzükümpang nung tokzüka toktsürji iba anak rüja shizükba tzü jema lidagi. Iba ama temang asoshi majung ta reprangetaka yimsüsürtemi odang toktsür, iba den külemi Tuli 17 mile nung Toll gate ka lir, aser idakji duty alirtemia tanga town nungi asen aliba lima nungang arua item anak rüja intoktsü bener arunung sen dang ngurbo ta sür odang toktsüba tenük agi angur, anungji iba ama main road nung ano Milak ayong anasa iba ama tesempatsü anak rüja intokba yabo Administration aser town nung yimsüsürtemi nisungtem tashidak nungi kümzüka alitsü ta asüba tangatetba nung tim tesem nung item anak rüja ya intokdaksü nung ajak asoshi tajungba asütsü ta lemsateper.

Public Concern
Tzüdikong Town

OFFICE OF THE
SENSOLIKUM VILLAGE COUNCIL
 Dist. Dimapur, Nagaland Dated 21st June 2017.

LOKTI INDI SENDEN JAZÜKER

Sensolikum mezüing lokti tentetpur (1st group) indi senden mongdang tan Honibar 24th June 2017 anepdang 9:00 ako nungi Industrial Estate Old complex besides CRPF Gate nung akatsü. Anungji züngsem ajak nübo medemtepa mapang shidak nung arua adentsü ayongzük.

Iba osang kaket nung sangdongba dak alaka kecha osang balaka shinga nem magütsütsü. Sendeni marur taking sen 500/- alitsü.

Sd/- **S. Bendang Ao** Chairman
 Sensolikum Village Council
 Sd/- **S. Chuba Tzudir** Secretary
 Sensolikum Village Council
 M/Ph. 9436006755

Saina, Sindhu, Srikanth nunger Australian Open tanabuba round-i iogo

Sydney, June 21 (Agencies): Tawa Indonesia Open champion K Srikanth aser Australia open koker alila Saina Nehwal nunger Bodhbarnü asaya koka Australian Super Series badminton asaya nung tanabuba round tongtetogo.

Olympic silver-medallist P V Sindhu aser Singapore Open Champion B Sai Praneeth nata tanabuba round-i iogo, ajisiaka India nung kicha asayar H S Prannoy dena parnok pezü tashi iba asayamong nungi tuguogo.

Srikanth-i mezüngbuba round asaya nung Chinese Taipei nunger asayar Kan Chao Yu 21-13 21-16 agi akok aser Sai Praneeth-i kanga meranga asayar 10-21 21-12 21-10 agi Indonesia nunger asayar Tommy Sugiarto madak takok angu.

Srikanth taruba asaya top seed Korea nunger asayar Son Wan Ho den asayatsü aser Sai Praneeth China nunger asyar Huang Yuxiang den asayatsü.

Tetsür kicha asaya nung

Saina kanga dang asayar tajung Korea tsür Sung Ji Hyun den asaya, ajisiaka taoba world no.1 Saina-i kanga junga asayateta 21-10 21-16 agi straight game nung akok. La taruba asya Malaysia tsür Soniia Cheah den asayatsü.

Tanga asaya ka nung Olympic silver-medallist P V Sindhu-i Indonesia Super Series Premier champion, Japan tsür Sayaka Sato ghonda ka ser minute 5 agia 21-17 14-21 21-18 agi akok. Fifth seeded Indian tsürla ya China tsür Chen Xiaoxin den taruba round nung asayatsü.

India tsür tarep asayar Ashwini Ponnappa aser N Sikki nati 21-11 21-13 agi Australia tsür Hsuan-Yu Wendy Chen aser Jennifer Tam madak takok angu.

Tebur tarep asaya nung India nunger asayar Satwiksairaj Rankireddy aser Chirag Shetty nati Hong Kong nunger asayar Law Cheuk Him aser Lee Chun Hei Reginald na 20-22 21-19 21-

11 agi kokogo.

Aisiaka tebur kicha asaya nung India nunger asayar HS Prannoy, Ajay Jayaram, Parupalli Kashyap aser Siril Verma nunger mezüngbuba round nung tsükogo.

Jayaram Hong Kong nunger asayar Ng Ka Long Angus-i 14-21 21-10 21-9 agi akok. Kashyap Korea nunger asayar Son Wan Ho den kanga meranga asayar 21-18 14-21 21-15 agi tamakok ngua asayamong nungi tuguogo.

Maneni tebur kicha asaya nung Siril Verma, Hans-Kristian-i tsükdaksü aser Prannoy 19-21 13-21 agi England nunger asayar Rajiv Ouseph-i tsükdaksüogo.

Tebur tarep asaya nung Francis Alwin aser Tarun Konan aser Manu Attri aser B Sumeeth Reddy nata tsükogo.

Tarep temeyoktep asaya nung Satwiksairaj Rankireddy aser Ashwini Ponnappa na 13-21 17-21 agi Hong Kong nunger asayar Lee Chun Hei Reginald aser Chau Hoi Wah nati tsükdaksüogo.

Queen's Cup nung Murray tsükogo



London, June 21 (Agencies): World No.1 Andy Murray Queen's Club tennis asaya mezüngbuba round nung Mongolbarnü Australia nunger asayar Jordan Thompson-i tsükdaksüogo.

Murray iba asayamong nung asayaba ya Wimbledon atema warm up asaya ka asütsü imlaa liasü saka pa world No.90 Thompson-i 7-6 (7/4), 6-2 agi koka iba asayamong nungi tuguogo. Murray-i iba asayamong tang tashi nung 5ben koka lir.

Mezüngbuba round nung Murray, Aljaz Bedene den asyatsüba liasü saka pa tekanük yiruba ajanga masayatetsüsa aküm, anungji Thompson pa melena asayatsü atema jaok. Thompson iba asayamong atema qualifying asayaba round nung tsükadoker liasü aser temelener ka ama yua liasü.

"Iba ya kü asoshi kanga takoksa tulu lir. Pai kü dang nungi tajungba asaya. Ni iba amai dang asaya nungbo Wimbledon makoktsü," ta asaya temer Murray-i ashi.


Iba tamakok ajanga grass nung asayaba nung Murray 14 ben tashi khen danga tamakok mongui aliba tembangogo, aji dang masü Queen's asayamong nunga asaya 10 tashi khen danga tamakok mongoi aliba tamakok nguogo.

"Andy ya world number 1 lir aser iba takok ya kü asoshi tang tashi nung takok tulutiba lir. Ni iba asayamong nung maongka nguli sü ta imlaa ataa liasü aser tang iba nung shilem agitetsü asoshi maongka anguba ya kanga tia taka," ta Thompson-i ashi.

Maneni iba asayamong nung top three seed asayar kata mali kümogo. World No. 3 Stan Wawrinka aser world No.6 Milos Raonic na prongla tsükogo.

Wawrinka Spain nunger asayar Feliciano Lopez-i 7-6 (7/4) 7-5 agi koka iba asayamong nungi tuguogo. Maneni Raonic shiba taoba küm Queen's aser Wimbledon nung runner-up jenjang tongteta liasü pa Australia nunger asayar Thanasi Kokkinakis-i 7-6 (7/5), 7-6 (10/8) agi koka liasü.

East Bengal puri Khalid Jamil, Head Coach asütsü shimtetogo



Khalid Jamil (File)

Kolkata, June 21 (Agencies): 2017-18 atema India nung football asayaba yimya melenshitsüba nung mejangjai liaka East Bengal-i taruba season atema Khalid Jamil head coach shimba sangdongogo.

Jamil ya taoba mapang India team nungi asyaa liasü aser 1997 küm pa mezüng asaya

tenzükdang SAFF Cup koka liasü. Pa küm 7 tashi Mumbai FC nung coach liasü saka pa atema takok tulutibaji taoba season nung Aizawl FC den I-League title akokba ya lir.

East Bengal puri tang tashi nung I-League title kata koka mali aser parnoki mapang mindoki dang pa alitsü asoshi deal ka yangluogo. Olulu osang ka ajanga ashiba agi, pa sen crore 1.25 agi alitsü aser iba ajanga pa India nung football coach tem rongnung sen timtiba aaba coach akümtsü.

"Ni Aizawl FC metoktsünüi liasü saka Nituda (assistant secretary Debabrata Sarkar)-i ni East Bengal telok nung adentsü asoshi temolung melendaksü," ta Jamil-i osangbenertem dang ashi.

"Ni I-League kokogo aser jenjang temaba kati tua

inyaktsü mapang ta ni bilemer. East Bengal ya club tuluba lir aser idak ya inyaktsü asoshi yongyaa atar. Kü nükjidongji mezüngbuba asaya akoktsübaji lir aser iba sülen jenjang ka nung jenjang ka ta atutsü,' ta paisa ashi.

East Bengal puri maneni asayar Lalramchullova, Mahmoud Al Amna aser Brandon Vanlalremdika nunger Aizawl telok nungi alizükogo aser parnok taruba season Jamil densa külemi asayatsü.

Arishi küm 40 tain coach ya ISL club Mumbai nung assistant coach ka ama inyaktsü asoshi maongka ngua liasü saka pai iba maongka thitsüa East Bengal nung adentsü asoshi shimtet.

Taoba season nung East Bengal pur Trevor Morgan lenisüba kübok asayaa liasü.



Board of Control for Cricket in India (BCCI) puri captain Virat Kohli aser chief coach Anil Kumble na mangatettep adokba meteta liasü saka tena ita 6 buba o mejimbeteper ta mejangjai liasü. Ano tawa osang ka temai adokba nung Cricket Advisory Committee (CAC), kong Sachin Tendulkar, Sourav Ganguly aser VVS Laxman nunger dena lir parnokia Kumble nem mapa mapang talila süklotsütsüba nung keniyongi dangbo molunga meliasü.

SSWBT aser Tata Trust-i... (TAPAK 1 NUNGI...)

Kaketshisatsü agütsübaji tenüng atema masü saka mapa angutsü atema agütsütsüla. Kaketshisatsü ajanga tashi agütsübaji, skills renlokdaksüba aser iba ajanga state aser linük nem tajangzük agütsüba asütsüla, ta tanü Acharya-isa ashi.

Nagaland nung petroleum aser minerals dena ali rongsen aika moaja lir, anungji lanur kaketshirtemi kaketshisatsü

shidak angazüka, ochimashi medeni ali rongsen ajanga tajangzük angutsü atema merangtsüla, ta paisa ayongzük.

Sentong nung Pastor Neichüriazho Chücha-i temoatsü meshia sarasadem, Consultant RAGSH, Rovilatuo Mor-i anküp tepela o jembi aser RAGSH Chairman Vilhuria Mor-i tenüngsang agüja sarasadem.

NH29 nung KYO züngsem... (TAPAK 1 NUNGI...)

Iba mapa inyakertemi parnok sasa nangzüksüla aser tatok meshitsüla, mesüra NH 29 nung parnok künübosa aputsü aser idangji timtem ajurutsü akok, kechiyong iba mapang lenmang nung senzürtemi nisung anaji jungjunga ajioka lir, ta WAYO

mendenpurtemisa shisem. WAYO-isa yirua alisang tekaratiba nung taneptsü angutsü atema moatsür aser Kiruphema Youth Organisation dang maneni nübortem tenzükbba mapa inyaktsü ayongzük, ta metetdaksüogo.

BILEMDANGANG

"shisa taka tebu kati pei chirnur meteta lir".